

四庫全書

集部

欽定四庫全書

集部

西河集卷一百四十一

詳校官編修臣曹城

助教臣常循覆勘

總校官庶吉士臣倉聖脉

校對官編修臣陳宗本

謄錄監生臣楊邦彥

欽定四庫全書

西河集卷一百四十一

翰林院檢討毛奇齡撰

七言絕句

四

客南臺送高兆之粵東

南臺節候近端陽客裏逢君去五年欲解五絲爲纜去

可能暫繫女螺傍

螺女江在南臺後

二

餞飲西園酒未醺  
平船先載隔江雲  
閩南荔子今應熟  
五月嘗時不共君

三

陸郎不用跨班騅  
前路逢迎知阿誰  
趙德門邊舊程里

看君乘興一相追

時君先到潮故云

四

三山五嶠總天涯  
擬向番禺汎海槎  
此去肯留蓮葉寨  
待予同看木棉花

盤谷先生歌爲陳舍人上善書扇

盤谷先生好作書年來右肘病難舒  
當軒傾得三升酒便上雞林估客車

二

盤谷先生書勢良鴻都新碣北中郎可憐老興渾難盡  
屈鐵更爲丞相章

三

西平仲子去何年近見先生賢復賢  
但著一篇盤谷賦

從無千頃洛陽田

四

盤谷如盤花似銀中書君老不勝春那知玉筍山前草

猶坐金華殿裏人

時舍人流寓江西

雪中別二友

梁園客散暮雲低  
闕伯祠前重解攜  
愁見馬蹄殘雪上  
兩行東去一行西

和苑中遇雪應制

龍馭春遊仙苑深祥雲曉幕帝臺陰若非霞集先行旆  
只道花開滿上林

同友游南阜山憶何道安詩

南阜蕭條最可思夕陽山木晚來時從君一望清秋色  
只當重吟何遜詩

題畫幃子

江城碧草正芊眠細雨南湖阻畫船纔是錦堂懸曉幃  
便教白鷺滿晴川

二

碧渚翩翹集鷺鷥  
新蒲片片映青袍  
原來共滯南湖曲  
別有凌霄一羽毛

除夕作

旅館椒花紅欲然  
椒盤愁向客中傳  
如何纔聽金雞唱  
便喚今宵是客年

同友柳下作

東度吳關值暮春  
關前楊柳暗長津  
行來相向垂雙淚



不是江陵種柳人

雨夜就亭送客觀芍藥卽席和施公子彥懋

花間送客暮登臺急管嬌絲且慢催君聽堦前正風雨  
莫教別後憶花開

二

何來玉樹謝家兒夜雨能歌送客詞華燭滿欄人盡醉  
一時回首看將離

予再赴湖西講堂已暮春矣聽座中歌孟氏牛

山篇不覺出涕因賦懷家園詩一章見意

三彈歸缺楚天涯日望西陵不見家  
痛殺江南春夜雨  
還開井上旅葵花

湖西講堂作

臨江草色滿前汀  
玉節諸侯自講經  
慚愧十年岐路客  
空隨車馬上汾亭

淮市柳與同行者

淮市西頭西楚祠  
祠前楊柳亂垂絲  
攀來不忍貽君看

記得樟亭折柳時

王二漢書予詩館壁

進士坊邊花巷春  
烏桺門巷寂無塵  
誰家能寫毛甞句  
只爲相如臣里人

西湖竹枝詞

斷橋西去杏花開  
年年橋上送郎回  
分明一片連橋子

何日何年斷得來

杭人呼橋子猶曰三橋子也

二

昭慶祠頭春水生大船長傍小船行湖東日上湖西落  
湖裏何時不是晴

三

小姑十五壓花鈿長抱琵琶坐小船借問小姑何處住  
陸公祠下岳墳前

四

十錦塘前好拔蒲十錦塘上百花鋪可憐八尺斜斜路  
隔斷南湖與北湖

五

湖心亭子近三尋  
儂日思郎思不禁  
阿郎好比湖亭子  
朝朝暮暮在儂心

六

小姑梳頭日西時  
不到山前到水涯  
屋裏插花湖裏焙  
山前歸路有風吹

七

水上花開水底紅  
東風吹水水濛濛  
水上看花猶自可

水底看花愁殺儂

八

誰道湖波鏡子同看花須看水中紅船邊水動花難見  
不若船頭看阿儂

九

阿儂不上採菱船只買白藕種紅蓮蓮花有心長得藕  
藕根無心長得蓮

十

青驄油壁漫相尋  
只在前山松樹林  
山雨不吹裙帶濕  
乾將絲子結同心

十一

湖頭闌干一樣鋪  
湖上一色好當壚  
莫尋橋畔紅闌子  
只認門前白頂烏

十二

莫道西湖好浪游  
南山雲斷北山頭  
莫道妾心能間隔  
外湖水入裏湖流

十三

飛來峰前花正開  
蝴蝶探花飛幾迴  
高峰不似花蝴蝶  
不識因何飛得來

十四

石新婦在釣漁磯  
桃花爲面竹爲衣  
面上桃花有時落  
湖邊望郎何日歸

十五

油車宛宛度西林  
日暮歸來懊惱深  
曾在第三橋上坐



金釵失落不曾尋

十六

買得甘瓜又買薑莫道甘苦不相宜前山空有臙脂嶺  
不上唇來那得知

十七

湖堤風起便生潮裙帶斜牽堤路遙女兒上堤欲歸去  
可憐綠草抱裙腰

十八

蘇小門前楊柳新  
西林橋下水粼粼  
琵琶只在盲婆手  
不見西湖愁殺人

遇蕭鍊師梅市

上清仙人紅玉腮  
冰漿分貯紫霞杯  
他年若問青牛使  
梅福山前曾見來

二

自返青華歷翠微  
千年縫就五銖衣  
相逢偶說前朝事  
親見英皇北狩歸

看玉田觀道士棋

玉田道士井公才白日分星石上排總是還鄉人不識  
儘留洞府看棋來

雨淋鈴

望京樓上月亭亭興慶宮中草色青舊日張徽今在否  
春風不奏雨淋鈴

史四廷柏五十飲席

閒園初發拒霜花賓客盈堂泛紫霞一石餘杭仙媪酒

千秋南渡相公家

二

畫檻丹楓炤綺筵  
楓花片片墜朱錢  
東方二十嫺兵法  
不道蹉跎三十年

欲上臯亭看桃花  
不得因題吳九彥  
聖竹院桃  
花幃子寄嘅

欲上臯亭細雨來  
春江渺渺夜舟迴  
那知竹院重逢處  
尚有桃花千樹開

蓋羅縫

瑤林玉闕啟金扉  
仙女親縫雲錦衣  
當時誤聽天雞唱  
失在蓬山不得歸

二

瑤林玉樹摘青房  
仙女親縫雲錦裳  
跨來緱氏山頭鶴  
看去金華道上羊

鎬姬彈琴得平沙落雁曲請賦

重重簾幙捲霜華  
西望衡陽音信遐  
何處青桐流響急

一行塞雁落平沙

二

金鑪香盡夜堂清  
過雁咿呀指下生  
最是琴心堪問處  
從頭撥拉兩三聲

南鎮春遊詞

春船兩槳白蘋開  
十里橫塘晚未回  
南鎮祠前北風急  
夏王陵上雨飛來

二

鷁頭艇子鹿頭車山路深深雨又斜何處相逢增懊惱  
凌家山下看桃花

三

香鑪峰峻少人登兩兩三三上禹陵陵前草深花似霧  
山頭風急雨如繩

南鎮後春游詞

同南士祇  
臣桐音作

晴江演漾動輕橈夾岸垂楊去路遙九十春光八十雨  
橫塘水滿晚生潮

二

金書玉柱鎮宮牌  
畫舫紅裙鑑水涯  
春草年年陵下路  
行人拾得雀頭釵

三

上宮碧玉駐青油  
自洗湘裙杜若洲  
落日橫江不歸去  
還尋窈石殿東頭

四

陽明洞口鎖天關  
瑤草琪花掩髻鬟  
欲覓雙成探玉藥



教人長上會稽山

寄徽之大敬代書時聞沈九嗣范邵二懷棠尚

南宮

春雁歸時未有書  
三年思食漸江魚  
親知盡獻長楊賦  
誰道還乘廣柳車

吹臺懷陸大進張四綱孫毛五駢

汴水東流去復來  
大梁城下重徘徊  
西游不見賢王客  
三月花飛滿吹臺

天台僧夜話

海州東望海門關  
玉洞桃花謝往還  
夜半老僧彈指後  
恍疑身在赤城山

王使君席同陳內翰贈歌者

江城四月柳如絲  
錦瑟彈成入破詞  
太守筵前爭認得  
大功坊底杜紅兒

二

槐廳入夜燭屏深  
試舞新衫是縷金  
座上詩成誰最早

鄴宮倚馬舊陳琳

宿東溪山寺遇雪

東溪山寺暮鐘天  
偕得生公一榻眠  
早起欲行溪口望  
雪花堆滿寺門前

槿花

紫槿東籬慢曲盤  
朝昏榮樂詎須看  
憐他相伴秋光裏  
傍暑開花直到寒

寄沈九秘書

吳興才子掌文詞日草黃麻共紫絲誰念十年烏鵲侶  
裁書一寄鳳凰池

溪亭懷舊

清溪深處一亭幽曾傍闌干洗玉甌二十年前亭下水  
至今猶帶落花流

舟中見張園鶴

紅橋畫幕勝青田獨鶴脩脩瞰碧川過客不知波下影  
長疑兩鶴住洲邊

一抄作青田羽客隔秋江紫蓼丹楓  
畫木杠水面聽聲如欲斷波間看影

似成  
雙

內叔陳大憲祖付予詩歌妓玉華因復拈贈

翠幄朱欄覆綠池西園公子夜裁詩  
自慚抱瑟同盧女不敢將歌付雪兒

李少宗伯更名臨江城外清江爲使君江感施  
分司之清也予去臨江因徘徊使君江上慨  
然成詩

蒲帆五月去江城城下江流清復清  
酌酒欲行重繫纜

最難忘是使君名

二

五月榴花照地丹  
離筵重聽五絃彈  
使君江上多情水  
還載孤舟下信安

過信安殷浩宅示田甥

有序

浩北征廢徙後  
唯韓甥隨經年  
因詠曹顏遠  
貧賤親戚離  
送甥江上涕泗橫  
流予過信安城南宅  
乃不覺有傷于心  
亦示甥云爾

當年殷浩南遷日無復親知相伴行今日一過殷浩宅  
教人流涕對韓甥

予悶居法華寺偶閱梁山牧牛頌乾菴大師問

如何是忘牛存人夙不解禪戲拈舉依韻

金絲

龍絡卸前山山北山南處處閒幕  
地擘開拽鼻手了無繩子在中間師稱善他

日舉似金輪僧僧曰李白自稱金粟王後身

徒誑語耳子真是耶因笑而成詩

咸陽宮前金粟山金粟花開只等閒若許傍人認金粟

如何金粟在花間

予夙得惡夢徐二十二慰以絕句因答

他鄉故國兩茫茫春草春花總斷腸但恨情多過王子

敢言才盡比江郎

徐詩末云莫愁隴上飛  
鸚鵡夢裏應吞五色雲

發紉詞爲舒城黃母胡太君作

蕭山城南白雨傾蕭山城北白雞鳴  
龍舒王姥將歸去白鹿銜花不忍行

二



黃門將母板輿中樹得山花浙水東不道河陽九秋月  
北堂萱草墮霜紅

三

翩翩丹旆出城西暫駐湘湖第一溪駟馬不行踣地哭  
平橋衰柳一時低

四

金章墨綬綵衣新次第堦前看雉馴自是王喬飛舄早  
玉棺先獻太夫人

五

已聞邵伯曾爲父不信王戎尚作兒子姓裂裳隨太母  
牽輶挽紼到江湄

六

樟亭古渡引旌幢望裏飛霞接上江披牡戴苴皆玉立

從來江夏本無雙

指其孫平十也  
舒城有飛霞亭

七

治從門外禮文新藩省稽留倍苦辛翟相總無踰制事

山濤豈是奪情人

八

晨輶曉蓋望中遐擬泛西陵江上槎  
痛煞野棠官路裏  
近前還發數枝花

同陳柱國將軍張杉赴商命說徵說舟集雨宿  
即事

江城度雨細如烟翠幕金尊襍管絃  
越女避人窺錦纜  
將軍下馬入樓船

二

爛柯山下石磐新錦洞秋花落繡茵行盡深林歸竟晚  
却疑身作爛柯人

三

將軍抱甕坐胡牀夜雨輕寒覆鸛鷀百尺冰荷紅幕裏  
風流重見杜當陽

四

商山兄弟謫仙才濫漱金缸汎玉醅一日邀予湖上去

十年藏我壁中來

五

南塘十里駐青絲正是南湖入暝時中夜舵樓重作吹  
張衡高詠四愁詩

未獲識邑明府趙公顏色途次感激愀然成詩  
家在平原歸去遲欲瞻趙勝更無期如何千載秋蓬客  
竟買紅絲付繡兒

過魯連村懷大聲

荒村寂寂散朝烟何處還尋魯仲連  
欲向村前騎馬過  
一時泪盡綠楊邊

哭趙弟

李子東游春復春王成賣卜死河濱  
寂憐旅舍埋金客  
猶在徐州作酒人

奉陪姜太翁觀燈宴作

綵炬千枝列錦城畫堂高宴夜吹笙  
爲看火鳳山前舞  
却上星橋樹杪行



西河集卷一百四十一



欽定四庫全書

西河集卷一百四十二

翰林院檢討毛奇齡撰

七言絕句

五

集晉安朱氏山亭題壁

閒亭高枕劍山阿  
暇日登臨此嘯歌  
幾曲山城萬重磴  
晚來青翠滿牕螺

二

栽花種竹傍東籬邀客同啣錦蠟卮忽見黑雲迷似海

樣樓山半雨來時

前山有樓名樣樓宋時建

署亭春雨和李觀察原韻

山亭雨過暝烟平亭下春池水自生但得司農頻置驛  
何須谷口再聽鶯

二

空向崑阿問尚平春雲帶雨檻邊生亭前自有桃花片  
不用啣來隔院鶯

奉陪姜京兆赴李觀察席酒間命歌者韓希捧觴乞詩遂口占用觀察春雨韻兼邀同席姜

九別駕爲書詩于扇歷陽徐泰畫背以寵之

宜春子弟奏昇平御史筵前錦鏐生唯有韓希花字舞

就中能作囀林鶯

花字舞名

爲尤悔庵悼亡時悔庵以召試在京

金門未許遂幽棲隴首先亡王霸妻試向玉河橋上望  
溝頭流水自東西

二

慢記簾釘掛綠裙當牕曾織竇家文春還不見瘡機轉

愁殺遼西舊使君

悔庵舊爲永平司理故遼西地也

三

銀牀斷綆素絲懸每讀新詞泪暗牽不道顧榮貽婦句  
竟成潘岳悼亡篇

奉寄張陸舟先生二首

白魚潭水暮生烟長繫張融岸上船何日東歸重相訪

開牕閒倚白雲天

二

林下曾同倒玉壺君家小阮得歸無

聞張五南士死嶺外

朝回一

望山河遠痛煞黃公舊酒壚

胡生之撫寧署

相逢燕市酒重携漫向金臺覓駉驂六月炎風吹似火  
送君仗劍到遼西

二

少年意氣本縱橫兄弟相過在撫寧舊日臨榆如可問  
清秋一上五花城

長安遇輪庵和尚即三十年前文園公也

三十年前角勝場今朝相會藉慈航不知投筆辭文府

可似從軍返武昌

輪公回武昌  
軍前入道

二

生年只合着袈裟悞向長安度歲華一夢春明猶未醒

眼看落盡曼陀花

時予小妻  
曼殊將亡

和邊詞

有序

番人有請收大草灘者爲守者所却政府誦之有詞  
大草灘前秋草腓燉煌無復獵焉支不虞四郡河西地  
尚見三州瓦剌兒

二

甘州賓兔肅州羗大草灘前撤舊防一自湟中開衛去  
有誰牧馬到莊浪

家明府以徵車赴

御試下第還任祥符為詩送之

宜春門外柳絲長  
欲綰雙輪返大梁  
祇爲漢庭尊吏治  
不將王吉作賢良

二

薰風冉冉動高旌  
空道宏詞繼永貞  
篋裏文章雄八代  
當時猶失退之名

三

吹臺南上夏雲移  
父老歡迎卓茂時  
千里雁行相望處



爲君一誦角弓詩

孫嘯夫歸錢唐

託跡蒼崖未易攀  
風吹海月弄珠還  
忽聞天畔金鷄唱  
知在蘓門一嘯間

二

雪滿平臺各賦詩  
枚生歸里未嫌遲  
朔風吹徹東湖水  
正是寒梅欲放時

入直即事

平明入直噪宮鷗  
傍午花陰一榻斜  
却笑玉堂無管鑰  
尚令清夢得還家

清明日請沐西郊與同館汪春坊喬侍讀汪檢

討主事作

朝回並馬出城西  
城畔垂楊一望迷  
却怪曉來分火後

輕烟飛作馬頭泥

京師呼塵爲泥

二

阜城門外有荒臺  
紫幙紅茵競舉杯  
多少縱橫林下路

花竿挑送紙錢來

三

畫輪丹轂犢頭車  
珠髻銀環覆碧紗  
馬上相逢春欲盡  
東風催放野桃花

四

百尺紅牆鎖玉扉  
望舒壇下換春衣  
青驄偶向林間住  
粉蝶爭從草際飛

五

八二八  
卷之十二  
謾謾松風古道場摩訶庵供大音王誰知世上三生果

只在關前八里庄

曾與王五別駕  
關外有訪故云

六

杏粥榆羹出佛筵石蓮花座法幢前西堂載酒曾留偈

回首春風又一年

七

華表崑崙高入雲搖車猶覆內官墳沙門指點前朝事

讀罷殘碑日欲曛

八

香臺坐處是香山

地名香山鄉

長笛頻吹鶴未還一道紅塵

歸騎遠庄亭半在夕陽間

春詞四首和覺羅博公所貽原韻

御溝垂柳暗殘春  
柳外聽歌河瀆神  
自笑蓼蟲長食苦  
縱啣花葉不知辛

二

油幕重重匝地青  
散垂螺片作牕櫺  
那知霧障三千幅

絕勝湘山十二屏

三

晴空映日颺游絲  
金水橋邊獨坐時  
愁煞隔牆深樹裏  
黃鶯啼歇最高枝

四

宣武門高十丈塵  
馬蹄踏盡未歸人  
故園桃李如相待  
爲我花前問呵新

白雪紅梅詞限韻  
儼長慶體和枚臣

雪裏誰歌白雪詞  
紅梅開得似臙脂  
雪花堆在梅花上  
半是桃枝半李枝

二

白雪紅梅有慢詞  
梅如紅粉雪如脂  
慢言霧幃遮華燭  
慢道冰綃裹荔枝

三

春來只唱雪梅詞  
不唱歡聞阿得脂  
誰道石家綾幔裏  
珊瑚擎出一枝枝

予舊夢一綠鸚鵡被鏤去以爲菟也暨來京師

甬東葉吟以上林鸚鵡四詩見寄遂感而和

之見者幸毋哂爲夢中說夢可耳

葉詩四首  
見倡和合

刻卷

翠衿紺臆去還非但聽宮前喚綠衣三尺紅絳空自繫  
不如還向隴山飛

二

洲邊靈鳥隔三湘長寄新詞到故鄉欲脫雕籠無別意



只言有友武游郎

三

三年憶別在江東  
清泪霑成畫柱紅  
采翼未分臨鑠去  
回頭猶是夢龜中

四

妙體金精世莫知  
金房安用羽毛奇  
肯留林邑丹脣在  
且詠吳江青草詩

題夫婿早朝圖爲汪主事作

疊鼓傳朝火樹紅  
龕髮車網去匆匆  
爲郎刷盡膠清髻  
猶在高丘一夢中

恭誦應安親王世子秋江夜月絕句依韻奉和  
秋入澄江白露寒  
月明夜靜水無瀾  
茫茫一片冰壺色  
只作青天萬里看

帝京蹋燈詞

毬場花帽打三郎  
重戴朱竿學教坊  
何處大鼇山最美  
三條火巷在廊房

二

勾欄缺處接燈棚五色番花四角擎蹋斷麻鞋歸不得  
永安門外老田更

三

放夜金吾首戴翎紅纓白馬駕朱軒月明只覺天星少  
撒作車盤兩面釘

四

夜涼蟬髻貼金貂漏滴銅餅水漸消忽聽盒中千礮發

襄陽城破在中宵

火盆科數有破  
打襄陽城名

五

一道燈輪去復迴  
瓜囊鏤作八仙臺  
走橋婦女呼教住  
好讓秧歌唱過來

六

靈佑宮聯祈穀壇  
蠟糊紅紙坐坊官  
露珠滴盡壇前樹  
綵翦蓮花偏耐寒

題觀瀑圖

唐寅  
畫

幾多隔塢新花谷無數臨江舊草亭對面挿來千仞碧  
從頭界破一條青

下車東華門無馬步行解嘲

上直東華負曉暎飛龍廐馬竟安存步行且學歐陽九  
不跨疲驢入禁門

自註唐學士入直例  
許借飛龍廐馬匹

呵筆

寒夜憑將信史裁虛堂銷盡夜鑪灰頻啣三品湘東管  
那得宮嬪呵凍來

漫示景文沙門

額上珠圓見有因雪山童子是前身慢投修水巖邊去

且作巢雲閣上人

時沙門將遊寧州故  
云巢雲湘溪閣名

二

會有三摩觀自然何須五字當隨緣請看帛氏從師日  
正是阿難得道年

蛤上人還住湘溪

一從擲錫中峯去二十年來溪路迷今日重尋朗公樹

白雲依舊滿湘溪

二

淨土門中清淨身珠繩百八掛來新西河居士將西渡

此後誰爲問道人

湘溪有淨土寺

山陽縣署歲飲

古署青雲繞歲幡屠蘓宴罷不知還莫辭漉酒當筵盡  
尚有懸魚在壁間

徐允哲讀予文稿辱貽二絕微及予舊事感生

于心依韻奉和

素衣何幸變爲蒼長就安丘壁裏藏今日逢君頭似雪  
依然度歲在他方

二

生平空自號文雄祇向天涯賦送窮羨煞滬城徐孺子  
題詩多在落花中

梁令索賦

梁竦聲名著有年臨安試宰宣徒然多才自作三都賦



乘興還揮五色絃

錢姚公子世兄歸桐城

山棠花發越江春  
公子空留廉吏貧  
自痛十年優孟客  
歸來還送負薪人

二

一錢亭下換征裘  
陣陣楊花點素甌  
此去皖城春漲後

思親應復上階州

尊人以予邑令遷階州牧

題同年李澄中中允所藏明月蘆花卷子

秋風浙瀝起菰蒲明月當汀雁影徂此日晴牕開卷後  
頓令清興滿江湖

二

瀛海蓬山幾作塵月明猶得認前津白花黃葉依然在  
誰謂菰蘆無此人

寄祝湘潭沈使君八十

琵琶峰頂企朝曦玉杖扶來好弄孫怪道行廚仙醖美

法曹曾使在吳門

使君曾爲  
蘓州推官

二

楚澤行吟八十秋，長看織女會牽牛。

初度七夕

醉來忽夢少

年事猶道慈恩寺裏遊。

高檢討同年假歸

太史將歸敞別筵，臨岐執手泪潸然。  
慢言夙昔相尋久，同館追隨又六年。

二

清秋過雨濕衣裝，出宿難留胄貴坊。  
南望碧山何處是，

謝公亭畔北湖傍

三

初衣換去驛樓斜扶持南還有阿楂

令嗣長君同歸

但到故園

應認得十年前種馬蘭花

四

山莊休沐慢徘徊策府猶需良史才  
暫向東田訪朋舊  
十旬假滿且還來

五

白首聯鑣春又春  
退朝長約乞閒身  
何期

召下還鄉日  
仍是罇前送客人

同朱宮允王內史眺郭外雙林庵後院河水次

壁間韻

荷風吹度暮秋天  
越客同登說法筵  
祇爲道林相憶久  
晚來如上剡溪船

題乘健讀書圖

深林收犢晚烟新  
露下松杉滴滿身  
不識比來工畫客

因何寫出帶經人

二

春草深林細雨初烏捷下坂不曾鋤恰疑人向緱山去  
獨坐蒲羈看漢書

飲王大司馬園林八首

綠野堂成野興濃開樽長對碧芙蓉閒尋翠嶂纔三疊  
便隔紅塵幾萬重

二

玲瓏石洞覆丹蕉洞口紅泉瀉去遙記得曲梁斜渡處  
賀湖南畔馬臻橋

三

潛行複壁忽天開石上凋盤汎白醅不是羊裘連榻坐  
却疑誤入洞中來

四

迴廊屈曲畫欄低紫蔓蒼藤到處迷十月晴光翻葉盡  
尚餘清影慢亭西

五

石樓高處一壺懸  
萬樹秋花接禁烟  
欲覓三山瑤海外  
但看雙闕彩雲邊

六

松臺月上待龜黃  
八節灘前再舉觴  
佳客總歸履道里  
名園原在集賢坊

七

東都賜第近



宸居誰道韋家舊  
谷虛時啟卿嬈  
微探去蒲牀散疊李  
筌書

八


冰荷開盡簇朱茵  
鶴露澆成馬埒銀  
紫嶠丹山何處返  
夜來愁煞醉歸人

漫和尤太史馬上口占原韻二首

家在江南楊柳村  
村前有客每停軒  
爲栽洛下潘家果  
長到吳中顧氏園

二

家在江南楊柳村每逢佳節斷人魂  
今來無酒澆寒食猶典朝衣出便門



西河集卷一百四十二

欽定四庫全書

集部

西河集卷一百四十三

詳校官編修臣曹城

助教臣常循覆勘

總校官庶吉士臣倉聖脉

校對官編修臣陳宗本

謄錄監生臣楊邦彥

欽定四庫全書

西河集卷一百四十三

翰林院檢討毛奇齡撰

七言絕句

六

下直東華門遇雪

逢觀寒生午漏稀  
掖門東出乍添衣  
宮牆柳色俱凋盡  
那得楊花撲地飛

二

萬里霓雲幕四隣寒風刮地總無塵誰憐玉樹花生候  
尚有金門裘敝人

寄田使君督學按部雲間

薄海文章有幾存淮南詞賦自言尊何如軺使相臨處  
江左名流盡在門

二

掄才按部遍江關佳士菰蘆自往還誰信龍津人去後

顧雍猶自在雲間

謂徐允哲也

陸明府有水晶一團中含水草影碧色名萬年

冰屬賦率筆

一團清水瑩遙空萬里昆明泐道通却訝春江蘋藻影  
何年收入玉壺中

二

誰割林圻碧玉泉中含水草尚鮮妍無如官到陳彭冷  
惡說寒冰有萬年

為如皋冒生題冊

公車載窠倚天高何似揚州江上濤  
紫氣千重南望遠  
有人把卷在如皋

二

生平三至廣陵城作賦曾無東部名  
今日為修高士傳  
題詩一寄冒先生

奉和呈裕親王園林題壁三絕句原韻應教

初秋

小苑寒林初作花  
苑牆西上接東華  
那知隆慶坊邊柳

只在岐王舊賜家

秋聲

秋到長安思渺茫五王宅傍

御街長一聞葉向林間下頗覺風來水殿涼

荷葉池

荷花開盡葉猶香雨後傾珠似夜光但使恩波留太液  
何須折作葢頭粧

寄答上海徐允哲



敝衣羸馬結黃塵待詔公車又一春  
遙憶申江新雨後  
晴牕深坐讀書人

二

御河楊柳甫垂絲寄到徐陵宮體詩  
日探懷中吟未了  
天街四月賣漿時

三

槐堂初入暑風清梅雨江南一望平  
記得滬城相別處  
青龍浦口夏雲生

四

制詔求賢空復催金臺終自待君來晉庭縱授王康第  
漢主還思徐樂才

題同館王檢討桃實畫幃

玉洞桃花碧葉陰紫文細核間黃金分明一片綏山景  
何日移來到上林

二

桃實如拳果繡苔瑣盤尚未薦瑤臺金門自是神仙侶

金瓶梅詞話卷一百四十三  
故遣東方偷得來

無題

華堂錦宴夜吹笙  
仙女盈盈下太清  
莫道彩雲無覓處  
隔簾聽得和歌聲

二

華堂錦宴夜吹簫  
仙女盈盈下碧霄  
莫道畫簾相望遠  
銀絲隔得兩三條

閩江送許遇之豫章

黃雀風生笋簟涼蒲帆四月下康郎閩南多少鮮紅荔  
散作船頭碎錦囊

二

細雨濛濛好濯枝

五月有濯枝雨

長途節候最堪思遙知南浦

傳觴日正是東湖競渡時

三

迤邐秋屏攬勝多旌陽原是舊巖阿莫憐丹竈無人問

須記陶鉞有客過

南昌許遜為旌陽令陶鉞遇書室名

四

紅蘭開盡綠蘭開我亦從茲去越臺君到潯陽倘乘興  
可能還泝浙潮來

雪灘釣叟歌四首

白雪灘頭舊隱淪雪花深處一垂綸蘆中來往人爭識  
道是吳江顧茂倫

二

松陵東下水濛濛浪花都作雪花堆投將簪子衝舟去

釣得鮰魚似屋來

三

白荻花開笠澤東  
移家住在荻花中  
前身疑是滄江叟  
後身疑是紫溪翁

四

西塞漁人未著書  
清灘萬疊雪來初  
松陵原有天隨子  
早向吳江學釣魚

敬製

仁孝皇后

孝昭皇后輓歌詞十四章

有序

康熙辛酉春仲

臣奇齡

恭送

大行兩皇后梓宮于沙河城東之寶家庄敬隨諸臣後  
迎

仗而泣爰思古者虞殯必有歌詞近世執紼不止鈴鐸  
故濯龍望幸朱奢進詩筮龜而行潘岳作頌乃以二  
年如喪之期加之百辟啣哀之日沙城舊殯齊赴

陵園館閣諸臣共扶纚綵仰觀畫雲之蜃輟頰傷墜露  
于雌衣馬頭祕器宛若神携雀尾明旒淒然目斷則  
愉皇之舞可以稍遲引殯之辭在所不免雖前人哀  
體多用短章唐世輓詩率皆五律顧白傳之輓元相  
亦用七言即江淵之哭宣妃僅成兩韻況乎絕句本  
清商遺調按之可為歌曼聲傳薤露新吟聞者易以  
感因不辭鄙陋爰為此詞世有知音或無貽誚

金幢畫翬導龍輶挽紼爭傳虞殯歌



雙輦一時歸玉隧千官齊送在沙河

二

帷宮曉度慢吹簫鹵簿開時宮仗遙京兆寢園須有護

君王且輟未央朝

時上親護  
殯至山陵

三

紅椿矗處纜牆低  
宮藻筐頻薦席齊  
蜃輅未離沙澗外

雲旌已過寶庄西

四

古堞徐開

殞殿尊容衣先已駕輶輻當時玉燕藏幽篋此日金蠶

繞羨門

初兩梓宮  
俱殯沙河

五

幡幡旒旒夾朱微疑是英皇並狩歸天半曉霞明象物  
車前清露濕靈衣

六

石窰曾通明月彎潞亭東去舊橋山六飛排作三屯衛

五校行來幾換班

七

羽葆千重映霧明  
駕將雙鶴負銘旌  
太常不用吹笳去  
仗馬交啣祕器行

八

親王命婦各班排  
纔見龍輜便舉哀  
不信數天愁思切  
試聽動地哭聲來

九

璇宮節儉本天然生貸貧人脂澤田幾日六駟臨御處  
尚拋貫路紙黃錢

十

獨孤卜宅建陵園遺命因山葬長孫

兩后後先真

聖善

皇情痛悼有何言

十一

彤管徽章定

母儀並誇嫔德共嫜師縱饒左氏為哀曲猶少揚雲作誄詞

十二

遵化陵園輦路通

先皇曾此塋遺弓移旃不憚宮車遠長恐昭丘在望中

十三

雉尾高寒逐繖迴白雲千里障瑤臺羽霓歸去原無跡  
惟有山前青鳥來

十四

法駕東行過玉田清塵除道百神聯袂歌恐助  
皇情惻不把銅鈴引殯前

祝母詞為羅氏兄弟作

芙蓉花發射陽湖日景南迴歲未徂何事綵雲留不去  
祇因庭樹有三珠

二

莫道庭闈樂事非羅含兄弟世應稀襄陽耆舊知多少

共採荷花贈舞衣

歲暮入史館書感用家太史韻

日從東觀討遺編坐弄鉛黃度歲年  
自笑中郎生子晚縱修漢史有誰傳

二

千門爆竹歲將除尚跨三花進石渠  
中夜草成羣盜傳

教人泪濕一林書

時闕題中有盜賊傳故云

何使君畫軸

天際芙蓉有路通梅花庄上鉢池東使君曾守東揚郡  
身在千巖萬壑中

花燭詞為馮公子協一作

相國堂前花燭開趨庭洗馬洞仙才移將海上連枝木  
琢作人間合卺栳

二

深房畫柱夾金杠時有露雲覆綺牕枕上芙蓉梁上燕  
怪他事事總成雙



三

親迎北府控驂驪何事炎風理鏡函只為榴花能結子  
愛將萱草種宜男

四

結就紅絲暗裏牽華燈慢把百枝燃但懸甲舍新裁帳  
好撒開元舊賜錢

五

試著單衫別樣紅鄉音遮莫學吳儂麻姑衣繡西施屐

家在蘓州鹿埭東

新夫人為崑山徐宮坊女

六

孔雀筵開汎客卮日長猶恐促粧遲誰知綵筆題奩處  
只在銀屏却扇時

送徐仲山南歸

當時郡國舉才賢獨詣公車思黯然記得秋潮初漲後  
與君相遇大河邊

二

太常策奏本無期司馬門間召試遲誰使公孫留北闕  
偏教轅固返東淄

三

西風吹柳御河黃出宿街南光宅坊思煞故園殘暑後  
荷花初放賀家莊

四

曉日橫門設錦茵繞朝此際贈鞭新中書門下停車久

曾薦徐寧第一人

益都夫子拆卷時特  
執卷薦之御前

五

周官湖口舊漁磯  
回首江皋事事非  
欲送故人歸里閭  
頻令清泪滿朝衣

六

九門地震尚誼聞  
何事還登惜別筵  
能用士如王吉輩  
不教人憶漢宣年

七

雙鳬北嚮一南翔  
悔見溪雲出岫長  
寄語君家女都講

莫將新句貯金箱

謂及門  
昭華也

和王侍讀索梅庚畫片原韻

擬作蓬山萬里遊  
小牕松竹繪清秋  
不知塵世餘多少  
此地能安十二樓

龔節孫以種橘小影索題二首

金衣素袖曉烟籠  
家在荆溪水榭東  
不道長安舊圖畫  
雙顏猶帶洞庭紅

二

朱盤橘柚剖霜天但對斯圖意惘然幾見蓬萊移種去  
誤傳天寶十年前

答和陸大嘉淑見貽原韻

憐君垂老客燕齊落日重逢禁苑西何處相期最相信  
錢塘江上伺潮雞

二

曾共登樓眺碧空平泉佳興有誰同可憐閣下千株杏  
留得溪南一樹紅

三

銀箏促促慢教搗萬仞黃埃起暮愁舊日酒徒今散盡  
燕姬雖好不須留

題劉生抱琴圖

伯倫意氣道真才手把枯筇掃綠苔此際長安好風日  
肯攜雷氏斲桐來

二

誰倩長康寫令顏深林日夕自來還當前無限滄洲興

只在高山流水間

同年丘檢討予養歸里

一紙黃封出

九重

聖人教孝每優容只因膝上需文度故遣雲間反士龍

檢討為學士  
南齋難弟

二

刺史堂高覆白雲

其尊人曾為刺史

河流千里接淮瀆羨君衣



上三花錦散作庭前五色文

三

金書百軸衆彤幘載去猶存修史銜借問錦堂樺燭裏  
夜來半臂有誰添

四

榆火初傳百子池橫門幾雨送丘遲最憐朝罷貽鞭日  
正是清明折柳時

送友人歸苕溪

京洛相期願已違  
前溪猶認舊柴扉  
只憐通路亭邊柳  
無數長條挽客衣

二

平津東閣住多年  
歸汎菱湖雨後船  
回首故人烟障裏  
還騎羸馬薊門邊

上巳同王二光祿修禊即事

細雨新吹九陌塵  
桃花又放曲江春  
同來柳市傳觴客  
仍是蘭亭修禊人

二

駿馬郊原籠碧絲紅竿挑餤踏花時如何兩度芳林宴  
不作王融上巳詩

清明二首

百兩騾車輾翠鈿單衣試著便門前祇因漢苑先傳火  
宮柳千株總帶烟

二

新裁寶幙障平蕪折得楊枝插髻無此日故園風雨後

畫船開滿賀家湖

題顧眉生校書畫蘭冊子

眉生曲中伎有名後為樊尚書妾名橫波

夫人

莫愁湖畔綠雲鬟  
手碾香螺畫遠山  
擷得洞庭花數本  
好留青影在人間

二

一幅生綃金錯裁  
幽蘭寫出仲姬才  
兒家自有千花譜

不藉黃荃粉本來

眉生自註傲壁間馬湘蘭筆

三

九畹叢生淺碧紋畫來香氣尚氤氲只愁幾片蘭蕕帶

難繫三條杏子裙

蘭蕕帶名樂府何用  
結歡收三條杏子裙

殉書詩書陳媛傳後

有序

陳媛沈計掾妻工佐餽以堇萱飴蜜得尊章懽年二  
十三死死時囑取生平所誦書殉塚中嗟乎是可傳  
已因拈殉書詩得四首書之云爾

荆桃花下駐塗車莫向空箱揀曲裾窄窄桐棺纔數尺

尚留一半莖殘書

二

誰道泉臺冷翠鈿銀牀猶是抱書眠却慚入塞文姬老  
空記遺文四十篇

三

秋風團扇裂齊紈落葉虛疑響珮環賦得盤中人不識  
欲留四角與誰看

四

白玉深深著地埋紅綿粉漬畫螺灰只愁繡字侵衣處  
化作金蠶出墓來

西河集卷一百四十三

欽定四庫全書

西河集卷一百四十四

翰林院檢討毛奇齡撰

七言絕句

七

題及門金公子看劍圖二首

淮西風雪苦流連  
篋裏還留寶劍篇  
今日龍阿看出匣  
教人長憶十年前

二



神清洗馬耀霜提束髮從游愧放麕竹裏琴書猶在眼  
不須重聽汝南鷄

題挈絹看竹圖

長向吳中擬卜隣王家樓子竹溪濱練裙葛帶尋常見  
錯認平原是繡人

重簡講官引見即事

君王便殿早傳宣重簡詞臣入講筵黃帕覆牀纔咫尺  
親呼姓氏

至尊前

二

曉禁彤雲捧日晴  
詞臣幾度選承明  
柳邊歸院千門靜  
聽得宮鴉三兩聲

寄懷錢太史同年

五年視草對朱扉  
墨汁看翻綠袷衣  
一自東廳人去後  
海山屏下到來稀

二

新披初服總同鄉

謂尤沈二太史也

秋到江南橘柚黃  
詘指武

丘西去路相逢應笑酒壚傍

三

上苑秋高曉籞開  
洞庭白鶴好飛迴  
至和未就新唐史  
尚待歐陽撰志來

贈趙司馬初度時正月十日將赴任長沙

銀幡賜罷甫成旬  
又見雕弧絃彩新  
暫借春盤當壽酒  
錦筵雙挿縷金人

二

蒼龍乍轉照星沙  
壽酒闌時已及瓜  
為待潭州司馬至  
秦人三洞早開花

依韻答隣友聽曼殊吹簫絕句二首

新安江水傍烏聊  
春去楊花滿地飄  
縱使秦臺堪弄笛  
難忘吳市是吹簫

二

國士新書慢射聊  
杏園纔見酒旗飄  
李謩不到人間以

誰使宮牆度玉簫

題姜實節歲寒圖

雪裏尋君續舊歡  
金昌亭下重盤桓  
相看多少蕭條意  
恰好題來是歲寒

二

朔風吹雪滿姑蘓  
濁酒傾來不用沽  
松竹院過梅樹下  
與君同入歲寒圖

劉大廷俊客死湖北同人哭于夕照寺有詩奉

和姜二承烈原韻

玉河秋水下高梁南望荆門道路長  
不見童鴻還闕下  
尚疑劉尹在丹陽

二

大隄南去慢徘徊招得巫陽且暫回  
江漢湯湯流日夜  
欲于何處望歸來

三

一世才名擅越東休將時數問窮通  
醉來但說狂時酒

醒後何曾識次公

四

修文天上誦彌羅古寺翻經奈梵何痛殺西華方木葛  
夕陽亭下一相過

三山驛送友之汀州

同向三山理客裝海舸先到柘湖傍楓亭荔子長汀酒  
一樣傾來不共嘗

奉和裕親王絕句六首即用原韻

苦熱

紅日敲敲麗碧空  
宮槐蟬噪夕陽中  
楚王自有蘭臺樂  
猶使迂臣賦大風

得雨

雷車初度雨初傾  
十日三時自有程  
此際一聞甘澤下  
何人不愜望雲情

晝寢

九疊屏風敞殿安  
桃笙卧去水晶寒  
卷衣侍女遙相待



尚作前宵月下看

秋聲

西苑纔迴少女風  
便聽寒鳥叫雌雄  
夜來奏盡清商曲  
只在宮前幾樹中

秋夜雨

空階滴瀝暗心驚  
夢去猶聞決雷鳴  
總是銅池懸左掖  
却疑銀箭下西清

射獵

平原草色帶霜威  
出塞將軍號射飛  
風裏直驅沙磧盡  
夜深方向瀟陵歸

楊青五十初度

元月初四日

憶昔閒堂對簡編  
子雲才藻正翩翩  
不疑學盡相如賦  
尚守玄亭五十年

二

裁度三朝賀玉墀  
故園東望一相思  
遙知晝矢祈年日  
正是銀幡祝歲時

題王武為吳山人畫

武為文恪公裔其畫意即山人詩也

但言李益詩堪畫不道王維畫有詩一幅生綃題不盡  
粉團芍藥與黃鸝

二

金閨邂逅朔風天不見吳生已十年却喜畫圖相對處  
草堂三月暮春前

弔姜貞毅詩

有序

萊陽姜給諫瑛以劾權相得罪杖戍宣州衛未至戍

所而國破遂寄吳市逮死屬其子移棺塋宣州四方  
觀者各投詩弔之予最後至亦成五首并詒其子安  
節實節貞毅者學者所易名也

曾披閭闔扣天關垂死孤臣未賜環遺命一棺何處塋  
宣州城外敬亭山

二

叢叢馬鬣覆柴青壠上荒碑未勒銘大鳥欲來雲乍起  
昭亭何似夕陽亭

三

唱盡門生薤上歌道傍虞殞已無多殿廷若個能攀檻

圖畫依然是荷戈

公像有荷戈圖

四

吳關不傍要離塚南鄭難為太尉墳回首故鄉歸未得  
可憐曾戍水西軍

五

長窺封事泪如流千里生芻愧未投欲向江南訊遺跡

德公兄弟在徐州

謂兩嗣公也

遂安方大明府有舊琴失而復得紀之以詩

焦桐本是道山材彈向霜風聲最哀一自前溪相失後  
是誰相伴幾年來

二

響泉亡後斷冰絲何幸重彈淶水詞猶是山牕初睡起  
東牆紅照夕陽時

予詩謬為商景徽閨秀所誦題詩過情因用其

原韻自謝兼以志謝其外人徐二咸清吾好  
友得貽與之

複壁藏書二十秋空箱蠹盡有誰收那知長史南遷後  
猶有昭容上絳樓

二

幾斛青螺傍鏡臺題成麗句百花開生平何幸交徐悱  
得藉三娘藻鑑才

附原詩 芙蓉露下小池秋金鴨烟消宿雨收讀罷

毛牲瀨上曲都梁艾蒨蒲粧樓  
綵筆翩翩傍玉臺  
頻將繡帙向風開可憐杜甫驚人句不數陳留曠世  
才

和徐昭華讀瀨中集原韻有感

秋霜如雪裹冰蠶石闕高時口重含不道美人居洛水  
能憐才子在昭潭

二

欲唱迴波未有詞鹽車無復騁雞斯若非道蘊真才女



若個能吟中散詩

附原詩 臘脂花落覆紅蠶獸頸初垂火自含坐對

西河才子句渾如秋月照澄潭 少小曾吟白日詞

蘆中人去竟如斯溧陽浣女空相殉悔不先吟瀨上

詩

題畫為壽

仙山萬仞接樓臺溪口遙從草閣迴因祝西池王母壽

銅餅盡貯紫芝來

書王編修母朱太君旌節錄後

京陵有子母為師丙夜猶難白玉脂傳得一經長自嘆  
只因中有柏舟詩

二

東堂祿養度居諸鎮向蓬池鱸鯉魚棹楔在門旌未已  
聖恩方錫紫泥書

過任丘清水湖作

棗林庄前清水湖滿湖菱藕并菰蘆馬頭錯問任丘客

誰賣松陵秋汎圖

二

湖水連連清且深  
長堤十里跨湖心  
行看堤上招商女  
但唱幽州馬客吟

三

碧柳千株傍水栽  
紅橋萬柱逐堤開  
祇應人在江南見  
那道車從趙北來

王進士新婚詩

璚瑁堂前雙燕飛  
王郎初向曲江歸  
携將舊賜三宮錦  
翦作新娘百子衣

二

試佩開元賜宴錢  
故邀夫婿看勻綿  
但知藕葉生江上  
不道蓮花在鏡邊

徐昭華乞試命題畫蝶喜賦二首

四十年來老自驚  
新妝門下女康成  
不知書面繡花好  
試看階前帶草生

二

深堂樺燭照啣卮隔幔吟成畫蝶詩不是小鬟頻乞試  
那知閨閣有陳思

秋杪重送秦太史假還山陰

共入東堂已七年碧山南望意悠然羨君兩度還鄉井  
不藉青龍寺後船

二

秋花初發約同歸何事君先秋雁飛一曲鑑湖能乞與

明年相待浣春衣

和憶鶴詩

長因賣賦結秋蛇  
右臂支離類凍茄  
何似蘭園仙驥好

只將雙爪畫圓沙

時予病臂故云  
蘭園葉氏園名

陪諸公集宛平相公園林十二首

有序

時當二皞候  
屈三商開平津東閣之門  
招鄴下南皮之客

聖主重元臣親題光德

時上親題席寵堂三字扁額手書以賜

詞人依上

宰侍宴芳林集賢里北車過裴相家園細柳營南席  
設岐公別業藉片時之請沐許延景以賦詩潘生陪  
梓澤不廢迴谿峻坂之詞公幹在西園每慙菡萏笑  
蓉之句因成短什便紀良游

山庄請沐駐驂驛曲徑通街出巷南纔到射堂門啟處  
門紗映出一山藍

二

青溪百折湫流低不見桃花路已迷欲向巖前尋舊跡

漁舟尚在洞門西

三

赤欄斜度暗杉關  
樹底吹笙鶴自還  
行過摘星宮畔望  
紅亭高出碧雲間

四

丘壑新題集慶餘  
剛逢

宸翰賜來初不懸  
宮左遊巖榜為有  
元和石鼓書

唐元和間

賜李寬石鼓書院扁額非韓愈石鼓詩也



五

潞公水曲一陂穿華子岡從百谷連丹竈曉移修竹裏  
繩牀晝設石壇邊

六

小雨初過景倍清山堂設饌午烟晴綠腰唱罷彈俱歇  
蒲耳惟聞流水聲

七

行廚斲桂煮雕胡淥酒清漿瀉玉壺粉黍細搏梁父雪

金叢雜剪碧紗蒲

八

草花續樹晚猶生  
石棧連雲斷復行  
怪道午橋光景別  
一花一石手經營

九

平門近市亘修廊  
西北高樓傍粉牆  
桂楹下臨光德里  
柳絲低拂永豐坊

十

尺五城南逼斗魁丹霞麗日是樓臺  
翠華若幸汾陰返定遣山庄圖畫來

十一

前林赤槿後烏桺湔湔流泉繞北陂記得籃輿曾養志

潘生西宅賦詩時

相公先人文貞公曾  
顧養于此舊名怡園

十二

石上窪樽就飲頻座中綺里髮如銀十年未得還商洛  
願作留侯門下人

青未閣十景之二和徐昭華作

郭外春山

城邊高閣起嵯峨  
城外春山列翠多  
只為倚牕描不盡  
尚留一半在青螺

城頭夕照

百尺珠簾捲落暉  
畫欄初換晚粧衣  
如何城畔丹鴉色  
偏照樓頭青鵲飛

閨門舟集別施使君閨章有感

當時惜別使君江清泪雙流滿玉缸今日金閨重話舊  
夜深紅燭照船牕

二

閨門夜汎酒盈卮後會兵戈未可期何處流連心最苦  
虎丘山下泊船時

尹坪以琴譜并詩寄予依韻賦答時小妻曼殊  
將亡

十五年前汝水濱為彈清角每相親一從君作蘓門客

頗使身慚柳下人

二

正向朱絃哭素心感君遺我舊徽音如何遠道將離曲  
雜作商陵別鵲吟

過姚江俞石眉宅

東行不逐海濤魚為覓雙鉤一駐車記取龍泉山後路  
秋花猶覆子雲居

題閩縣溪廩老人偕隱卷子

誰謂藍田好避秦  
鹿門猶有未棲身  
何如負甌仙山下  
夫婦同為採藥人

二

忝白閒從絃器排  
相携一上釣龍臺  
十年虛逐東方隱  
我欲從君汎海來

題佟二公子記年圖  
公子善書畫并詩  
是圖把筆伸紙跼  
蹐未下

鄭虔三絕有誰猜  
一幅籐箋帶笑開  
未蘸墨潭先問取

是書是畫是詩來

二

蕭蕭梧竹映清姿  
畫裏逢君最可思  
彷彿舊年湖舫醉  
孤山亭上畫梅時

孟生南歸

四月輕裝出帝都  
秋來我亦乞官湖  
到家若遇茱萸節  
同向山陰訪柳姑

二



天安門外上書遲頓折宮牆碧柳枝北闕敞廬休詠去  
篋中應載益亭詩

碧山庵

團標八尺掛長幃雨後斜翻松頂暉山半沙門持鉢下  
碧天片片落僧衣

病臂辭試讀棠村先生新詩呈簡

禁城花柳日芊眠左臂書空思暗然挾得棠村詩一卷  
不須更詠鹿門篇

二

肘上生楊欲覆身春衣換去只懸鶉諸生薦達雖無分  
猶是司徒門下人

陳迦陵妓席予不得與因索題扇賦此時予以  
病臂赴部辭試用簡崇村夫子詩人字

右手從來慣詘伸翻因賦洛坼如龜從今幸免娥媚妬  
何必低頭見美人

題徐髯畫像

髯字  
祐植

科木長蘿掛紫絲溪山深處坐題詩試看石上含毫處  
何似參軍入幕時

二

挹水烹泉蘸澗笔掀髯抵石踞來高不知相對滄洲客  
頰上于今添幾毫

丁澎採芝圖

葑園先生冠幘冠深林負杖斲芝還祇因相見還相憶  
手把斯圖看復看

二

獨向深林採玉芝，林端駐杖有何思。  
須知屬國南還日，

猶是顛毛未白時。

葯園從塞外歸故云

集侯官莊明府園居即事

數畝閒園迴絕塵，丹花碧樹蔭通隣。  
最憐薛老峰邊石，


偏對蒙莊座上人。

烏石山上有薛老峯正當園南面

二

雞鶩盡炙酒如霏，幾局棋枰傍晚霞。  
啼鳥不知山客去，

雨餘猶坐刺桐花



西河集卷一百四十四